

**VENDIM**  
**Nr. 769, datë 15.12.2021**

**PËR KRITERET E MBËSHTETJES SË NISMAVE, TË PROJEKTEVE QË  
SYNOJNË MBROJTJEN E TË DREJTAVE TË PAKICAVE KOMBËTARE,  
RUAJTJEN DHE PROMOVIMIN E IDENTITETIT TË TYRE TË DALLUESHËM  
KULTUROR, ETNIK, GJUHËSOR, TRADICIONAL E FETAR DHE KRITERET E  
PËRZGJEDHJES PËR FINANCIMIN DHE ADMINISTRIMIN E FONDIT PËR  
PAKICAT KOMBËTARE**

Në mbështetje të nenit 100 të Kushtetutës dhe të pikës 3, të nenit 21, të ligjit nr. 96/2017, “Për mbrojtjen e pakicave kombëtare në Republikën e Shqipërisë”, me propozimin e Kryeministrit, Këshilli i Ministrave

VENDOSI:

**KREU I**  
**DISPOZITA TË PËRZGJITHSHME**

1. Me qëllim sigurimin e mbrojtjes e të promovimit të të drejtave të pakicave kombëtare përdoret fondi i krijuar për pakicat kombëtare, për mbështetjen e nismave dhe të projekteve që synojnë mbrojtjen e të drejtave të pakicave kombëtare, ruajtjen dhe promovimin e identitetit të tyre të dallueshëm kulturor, etnik, gjuhësor, tradicional e fetar.

2. Fondi për pakicat kombëtare parashikohet si zë më vete në buxhetin vjetor të shtetit. Kërkesa për këtë fond bëhet pasi Komiteti për Pakicat Kombëtare të jetë konsultuar me përfaqësuesit e pakicave kombëtare dhe, pas konsultimit, përgatit një relacion vjetor, të argumentuar.

3. Fondi për pakicat kombëtare, pas miratimit, administrohet nga Komiteti për Pakicat Kombëtare, në përputhje me rregullat e parashikuara në legjislacionin në fuqi për menaxhimin e sistemit buxhetor në Republikën e Shqipërisë.

4. Për efekt zbatimi të këtij vendimi, termat e mëposhtëm kanë këto kuptime:

a) “autoritet financues”, autoriteti përgjegjës për sigurimin e mbrojtjes dhe promovimit të të drejtave dhe të interesave të pakicave kombëtare, “Komiteti për Pakicat Kombëtare”;

b) “kandidat”, çdo subjekt përfitues, i cili merr pjesë në një procedurë konkurrimi, sipas këtij vendimi dhe legjislacionit në fuqi;

c) “grant”, shuma e përcaktuar e fondit për mbështetjen e nismave dhe të projekteve, e shpallur në dokumentet e konkurrimit gjatë një procedure konkrete, që i dhurohet pa interes subjektit përfitues nga autoriteti financues, në përputhje me kriteret e vendosura sipas këtij vendimi dhe legjislacionit në fuqi;

ç) “dokumentet e konkurrimit”, dokumentet që autoriteti financues vë në dispozicion të të gjithë kandidatëve të interesuar për përgatitjen e projektpropozimeve.

5. Subjekte përfituese të granteve, sipas këtij vendimi, janë:

a) organizatat e shoqërisë civile, të cilat janë të regjistruara sipas ligjit, ushtrojnë veprimtari sipas objektit të përcaktuar në statutin e tyre dhe disponojnë NIPT;

b) personat fizikë për mbështetje në kërkime, studime dhe lloje të tjera mbështetjeje individuale, që kontribuojnë në ruajtjen dhe promovimin e identitetit kulturor, etnik, gjuhësor dhe tradicional të pakicave kombëtare.

6. Në procesin e shqyrtimit, të përzgjedhjes së kandidatëve përfitues dhe të shpërndarjes së fondeve për mbështetjen e nismave dhe të projekteve që synojnë mbrojtjen e të drejtave të pakicave kombëtare, ruajtjen dhe promovimin e identitetit të tyre të dallueshëm kulturor, etnik, gjuhësor, tradicional dhe fetar, autoriteti financues mbështetet në këto parime:

- a) lirinë e pjesëmarrjes e të konkurrimit;
- b) mosdiskriminimin e trajtimit e barabartë;
- c) transparencën e procedurave dhe të vendimmarrjes, duke u ofruar të gjithë kandidatëve të dhënat e procedurën përkatëse;
- ç) përputhshmërinë me objektivat e grantit e me efektivitetin e përdorimit të burimeve, në bazë të sistemit të konkurrimit dhe të kriterëve, që mundësojnë vlerësimin e projektpropozimit dhe të specifikimeve teknike e financiare për përzgjedhjen e shpërndarjen e grantit;
- d) mungesën e prapaveprimit, duke përjashtuar mundësinë e shpërndarjes së fondeve për veprimtari tashmë të realizuara në datën e vendimmarrjes;
- dh) paanshmërinë e shqyrtimit e të vendimmarrjes dhe parandalimin e konfliktit të interesave;
- e) përjashtimin e mbivendosjes, që nënkupton shmangien e financimit të së njëjtës veprimtari për të njëjtin interes konkret, më shumë se një herë, gjatë një viti fiskal.

## KREU II PROCEDURA DHE KRITERET E PËRZGJEDHJES PËR MBËSHTETJEN E NISMAVE DHE TË PROJEKTEVE

1. Procedura e përzgjedhjes së projektpropozimit përfshin fazat e mëposhtme:
  - a) njoftimin paraprak, publikimin e çdo procedure konkurrimi për një grant të caktuar dhe vënien në dispozicion të dokumenteve përkatëse të konkurrimit;
  - b) ndryshimet dhe sqarimet e bëra gjatë procedurës, si shtyrje afatesh;
  - c) dorëzimin e projektpropozimit e regjistrimin e kandidatëve pjesëmarrës nga autoriteti financues;
  - ç) shqyrtimin e pranueshmërisë së plotësisë të kriterëve të regjistrimit dhe vlerësimin e projektpropozimit;
  - d) njoftimin e rezultateve të konkurrimit, përfshirë kushtet për përshtatje ose ndryshime;
  - dh) në rast refuzimi të kandidatëve, deklaratën dhe arsyet e këtij refuzimi;
  - e) negociimin e mundshëm për ndryshimet e përcaktuara, si kusht për miratimin e projektpropozimit fitues;
  - ë) negociimin dhe nënshkrimin e kontratës;
  - f) botimin e informacionit, sipas përcaktimeve të legjislacionit në fuqi.
2. Brenda muajit janar të çdo viti, Komiteti për Pakicat Kombëtare përgatit një program vjetor “Për pjesëmarrje në procedurë konkurrimi për financim me grante”, që planifikon të organizojë gjatë vitit.
 

Të gjitha njoftimet për procedurat e konkurrimit, sipas përcaktimeve të këtij vendimi, shpallen në faqen zyrtare të internetit të autoritetit financues.

Komiteti për Pakicat Kombëtare shpall në faqen e tij zyrtare udhëzimet për thirrje për propozime, formularin e aplikimit, formularin e buxhetit, kriteret për përzgjedhjen e kandidatëve fitues, një listë të plotë të dokumenteve të nevojshme për t’u paraqitur dhe një kontratë tip.
3. Autoriteti financues përgatit dokumentet e konkurrimit, në të cilat përfshihen të paktën:
  - a) të dhëna të përgjithshme për këtë autoritet;
  - b) kriteret minimale të kualifikimit dhe dokumentacioni i nevojshëm për të provuar këto kriteret;
  - c) kushtet e grantit;
  - ç) udhëzimet për afatet dhe formalitetet që duhet të respektohen;
  - d) të dhënat për kriteret e përdorura për përzgjedhjen e kandidatëve.
4. Kushtet e përgjithshme të pranimit të kandidatëve janë, si më poshtë vijon:
  - a) të mos jenë dënuar me vendim gjykatë të formës së prerë për kryerjen e një vepre penale, si dhe të mos jenë në procedim penal për kryerjen e një vepre penale;

b) në rastin e një personi juridik apo organizate jofitimprurëse, të mos jenë në proces gjyqësor, si dhe të mos jenë dënuar me vendim gjykate të formës së prerë për kryerjen e një vepre penale;

c) të kenë në objektin e ushtrimit të aktivitetit (për personat fizikë) apo në statutin e tyre (për personat juridikë dhe organizatat jofitimprurëse) mbrojtjen, promovimin, mbështetjen e të drejtave të pakicave kombëtare;

ç) të mos jenë subjekt i detyrimeve tatimore në organet shtetërore përgjegjëse;

d) të jenë të regjistruar në Qendrën Kombëtare të Biznesit ose në gjykatë dhe të kenë status aktiv;

dh) të kenë aftësi menaxhuese dhe të paraqesin bilancin vjetor të tyre, si një kriter për të shpërndarë në mënyrë jo vetëm cilësore, por edhe të drejtë grantin për financim.

Kandidatët e huaj, për të marrë pjesë në konkurrim, i nënshtrohen legjislacionit në fuqi në Republikën e Shqipërisë.

5. Kushtet e grantit përmbajnë:

a) karakteristikat e projektit;

b) fushën e veprimtimit;

c) objektivat e përgjithshëm;

ç) objektivat specifike;

d) fazën e raportimit, financiar e narrativ;

dh) dokumentet mbështetëse, listëprezencën, fotot;

e) dokumentet financiare dhe narrative;

ë) veprimtaritë e nevojshme që duhen kryer;

f) kriteret e vlerësimit të rezultateve.

Granti nuk do të përdoret në asnjë rast për financimin e kostove operative të tjera të kandidatit përfitues, jashtë projektit të përzgjedhur.

6. Autoriteti financiar duhet të përcaktojë dhe të përfshijë në njoftimin për pjesëmarrje në një procedurë konkurrimi afatin e dorëzimit të projektpropozimeve. Ky afat nuk mund të jetë më i vogël se 45 (dyzet e pesë) ditë kalendarike nga data e publikimit të njoftimit.

7. Afati për vlerësimin e projektpropozimeve dhe shpalljen e rezultateve është jo më shumë se 30 (tridhjetë) ditë kalendarike nga afati i përcaktuar në dokumentet e konkurrimin, për dorëzimin e projektpropozimeve. Kandidatët njoftohen brenda 15 (pesëmbëdhjetë) ditëve kalendarike nga data e përfundimit të vlerësimit të rezultateve të konkurrimin. Autoriteti financiar dhe subjekti përfitues negocionjë dhe nënshkruajnë kontratën brenda 30 (tridhjetë) ditëve kalendarike nga data e njoftimit të rezultateve të konkurrimin.

8. Kryetari i Komitetit për Pakicat Kombëtare:

a) siguron hartimin dhe zhvillimin e kushteve të granteve, në përputhje me specifikat e fushave;

b) shpall publikisht grantin dhe kriteret e konkurrimin e të përzgjedhjes së kandidatëve përfitues;

c) krijon komisionin e vlerësimit të projektpropozimeve prej jo më pak se 5 (pesë) vetash për çdo procedurë konkurrimi, në përbërje të të cilit marrin pjesë, me cilësinë e të ftuarit dhe me të drejtën për të shprehur qëndrimet e tyre, përfaqësues të organizatave të shoqërisë civile;

ç) përcakton afatet dhe personat përgjegjës për negociimin e kushteve ose të ndryshimeve të nevojshme në projektpropozim, sipas kushteve të përcaktuara nga komisioni i vlerësimit;

d) njofton kandidatët pjesëmarrës në një procedurë të caktuar;

dh) lidh kontratën me fituesin.

9. Komisioni i vlerësimit ka këto detyra:

a) hap, shqyrton dhe vlerëson kriteret e kualifikimit të projektpropozimeve të marra, në përputhje me kriteret dhe afatet e përcaktuara në dokumentet e konkurrimin;

b) shpall rezultatet e konkurrimin dhe vë në dijeni kandidatët pjesëmarrës për projektet jofituese, duke dhënë dhe arsyet përkatëse.

10. Vlerësimi mbështetet në përputhjen e projektpropozimit të paraqitur nga kandidati aplikues në procedurat e konkurrimit për financime me grante, me qëllimin e organizatës/kandidatit dhe programin që zbaton, në kapacitetet e kandidatit, në efektshmërinë e aktiviteteve, në pritshmërinë dhe koston e tyre.

Projektet përmbajnë të dhëna për qëllimin, objektivat specifike, veprimtaritë, buxhetin, rezultatet e synuara. Vlerësimi i tyre parashtrohet sipas treguesve të qartë e përcaktimeve të argumentuara.

11. Në kontratë përcaktohen, të paktën, mënyra e transferimit të fondit, dokumentacioni dhe mënyra e raportimit financiar dhe e performancës, llojet e shpenzimeve të njohura e të pranueshme, format e kontrollit, përfshirë detyrimin e subjektit përfitues për të vënë në dispozicion të Kontrollit të Lartë të Shtetit dokumentacionin për veprimtarinë financiare të kryer, mënyra e dokumentimit të shpenzimeve dhe e produktit/rezultateve të projektpropozimit të financuar, si dhe kushtet apo përgjegjësitë e tjera të ndërsjella.

12. Autoriteti financues shpall në faqen e tij zyrtare të internetit emrat e të gjithë përfituesve të projekteve, përmbledhjen e projekteve të financuara dhe shumat përkatëse të granteve.

13. Çdo projekt i financuar monitorohet nga autoriteti financues për zbatimin e veprimtarive të deklaruara sipas legjislacionit në fuqi.

### KREU III DISPOZITA TË FUNDIT

Ngarkohet Komiteti për Pakicat Kombëtare për zbatimin e këtij vendimi.  
Ky vendim hyn në fuqi pas botimit në Fletoren Zyrtare.

ZËVENDËSKRYEMINISTËR  
**Arben Ahmetaj**